

Geliefde Lourensriverder

Een van ons gemeentelede vra vandag vir my die woorde van die Sendinglied en dis so mooi dat ek dit sommer ook met jou deel:

Ek wil kom stilword hier aan u voete;
Ek wil kom hoor wat U vir my sê.
Ek wil kom oopmaak vir U Gees, Heer;
As ek my vrae voor U kom lê.
Want soveel mense sterf sonder Jesus –
Soveel mislei na die ewige dood;
Daar's soveel oorvloed, selfsug en rykdom –
Wyl ander ly in hongersnood

Ek wil kom vra, Heer, wat van die kinders
Wat nood en lyding glad nie verstaan?
Wat van die mens wat stukkend en seer is?
Wat van die een wat eensaam vergaan?
As ek dan vra, Heer, "waar is U liefde?"
Moet ek erken, dit lê nog by my!
Hier in my selfsug, stap ek gevoelloos
By nood en seer van mens verby!

Maak my 'nbeeld van Jesus se liefde
Om in die nood U hande te wees.
Ek gee myself aan U as 'n offer



Onder beheer
van die Heilige
Gees
Hier staan ek
voor U, net soos
Jesaja
Raak my nou aan
met U Heilige
Vuur.
Sodat ek oral U
liefde kan uitdra

Hier is ek Heer,
U kan my stuur
Hier is ek Heer,
U kan my stuur...

NUUSKRUMMELS: 31 Oktober 2019

NUUS UIT DIE KERKKANTOOR:



DINAMIET KIEDZ

As gevolg van Feesmark in die saal, sal kinders nog Sondag 3 Nov in die konsistorie bymekaar kom.

Lourensriver Strand **FEESMARK**

h/v Broadway, Da Gama & Jenningsstraat, Strand

25 Oktober - 9 November
Weeksdae | 09h00 - 19h00 Saterdae | 09h00 - 17h00



Daar is ook ander smullekker eetgoed: Volledige spyskaart in Feeskafee beskikbaar.

LIEFDADIGHEIDSPROJEK:

Die Buurtwag is saam met Stad Kaapstad besig met 'n program om werkloses te probeer help om werk te kry. Een van die inisiatiewe is om informele parkeer-assistente met meer 'forme' assistente te vervang. Hulle word deur die Buurtwag en Stad Kaapstad geëvalueer, geregistreer en gemonitor. Daar sal Sondagoggende by die kerke van die mense geplaas word.

Hulle is tans van die bestes in die poel en is regtig net mense wat 'n tweede kans soek. Meeste is die enigste broodwinner in 'n familie.

Hulle kan uitgeken word aan hul **pienk buurtwag onderbaadjies** wat hul dra. Geen ander persoon mag asb. ondersteun word nie. Dit geld ook vir al die parkeer-assistente in die dorp.

Daar word elke Dinsdagaand met hul vergader, opleiding gegee, asook terugvoer van hulle en die gemeenskap bespreek. Hul kry dan ook 'n kort geestelike boodskap.

Ondersteun asseblief hierdie inisiatief eerder as om geld te gee vir mense wat by verkeersligte staan en bedel. Ondersteun en motiveer ook asb. hierdie mense met 'n mooi, positiewe gesindheid.

Navrae: Carel Gersbach @ 083 635 2114



NUUS UIT DIE GEMEENSKAP

BOESMANLAND LAM van BRANDVLEI af KAAP toe!

Johan bring weer vir ons lam van uit die mooie Karoo na die Kaap op 28 November 2019, betyds vir die Desember vakansie.

Die lammers word met groot sorg voorberei en verpak soos meeste van julle al ondervind het.



Die opsies van verpakking om uit te kies is as volg:

Heel lam alles tjops

Heel lam met een boud heel, res tjops

Heel lam met twee boude heel, res tjops

Half lam alles tjops

Half lam met boud heel, res tjops



Net aanvullende notas oor lam se verpakking: die ribbes word heel gehou en net geknak vir maklike gebruik.

Kookvleis word verpak in sakkies en bygevoeg tussen tjops wat verpak word 4 tot 6 tjops per sakkie.

Ons maak seker alle heel lammers weeg 18 kg na verpakking, en half lammers 10 kg na verpakking.

Die spesiale prys vir die volgende bestelling is R88 per kg. Dus R880 vir half lam, en R1584 vir heel lam.

Indien jy sou belangstel, bevestig asseblief jou keuse aan my teen nie later as Woensdag, 6 November 2019 om 12h00. Ek sal dan bankbesonderhede laat kry vir betaling en ook reelings tref vir aflewering.

Navrae: Tertia 079 668 4866 / tertiabrandsa@gmail.com



JAN KRIEL INSTITUUT: LIGGIEBOOM, 23 NOVEMBER 2019

Lees asb. die inspirerende storie onderaan die Nuuskrammels van Emily en kyk of julle wil ondersteun. "Daardie Sondag, op moedverloor se vlakte, het Emily van die Sondagskool af gekom met 'n gekreukelde papiertjie in haar natgeswete handjie. Daarop het gestaan: God het 'n plan met Emily se lewe!"

BERG 80 VERJ: NOVEMBER 2019

LET WEL: Ouderdom op lys is huidige ouderdom tensy verjaarsdag al verby is.

Eileen	Matthee	81	11/01
Ida	Du Preez	83	11/09
Dallie	Dalton	79	11/14
Ria	Kleynhans	83	11/14
Magdalena	Peters	102	11/15
Alta	Ellis	82	11/16
Eddie	Van Der Walt	80	11/16
Freda	Van Zyl	81	11/16
Chris	Matthee	81	11/19
Pieter	De Jager	83	11/21
Matilda	Stemmet	90	11/22
Ben	Dixon	87	11/27
Fanie	Louw	81	11/29

JES. 46:4 "Ook tot in julle ouerdom
is Ek die Here, tot in julle grysheid
sal Ek julle dra. Ek het julle gemaak en
Ek sal julle vashou, julle dra en julle red.

Baie geluk & vele seën

KNIEWERK:

- ✚ Gerda de Villiers vir opvolg-operasie
- ✚ Paul Louw kry steeds kankerbehandeling
- ✚ Innige meegevoel met Ria de Villiers (Petrie se ma) & familie, met die heengaan van haar broer
- ✚ Danie Botha herstel na hospitalisasie
- ✚ Erna van Wyk vir gesondheid

FOKUSTEKS VAN WEEK ASOOK SONDAG, 27 OKTOBER SE BOODSKAP: 2 Tes 1:1-12 (21STE WEEK IN KONINKRYKSTYD)

Die kerk in Tessalonika het tot stand gekom deur die prediking van Paulus, Silvanus en Timoteus op drie opeenvolgende Sabbatte in die sinagoge (Hand 17:1-9). Alhoewel die presiese tydperk wat hulle in Tessalonika deurgebring het nie duidelik is nie, is dit moontlik dat hulle vir maande daar gebly het. Die gemeente het ontstaan onder die Jode, maar mettertyd het Grieke die meerderheid van die Christene uitgemaak. Dit is verder belangrik om daarop te let dat daar ekonomiese en sosiale verskille binne die gemeente bestaan het, wat konflik veroorsaak het. Hierdie vreemdheid van die gemeente teenoor die res van die stad (tesame met hulle lojaliteit aan 'n ander Here as die keiser) het waarskynlik daartoe gelei dat die gemeente as teiken gemerk is vir vervolging deur die breër gemeenskap.


2 Tessalonisense 1 getuig van God se krag en God se werk in die gemeente. Die gemeente het nie uit menslike vindingrykheid of menslike vaardigheid ontstaan nie. Dit was die krag van God.

Wanneer ons oor hierdie teks nadink, moet ons ook fokus op en getuig van **God se krag en werk**. Ons teks is nie 'n morele lessie oor hierdie gemeente nie. Ons moenie die gemeente van Tessalonisense voorhou as voorbeeld van geloof en volharding wat gemeentes behoort te na-aap nie.

Nee, ons moet praat oor en onself oopstel vir die kragtige werk van God se genade en vrede in ons.

Hierdie hulpbronne van genade en vrede kom van die Een wat hemel en aarde geskep het. Die Een wat spreek en dit gebeur. Die Een wat vanaf die begin daar was.

Hierdie hulpbronne kom vanaf die Een wat die oorsprong van alle dinge is, die Een wat lewe gee en asem inblaas en Vader is van alles en almal. Maar God wat ook Vader genoem word, wys daarop dat Hy nie verlangs staan nie, dat Hy nie geskep en geloop het nie, maar dat Hy sorg; 'n ouer, dalk selfs 'n alleen-pa wat ook soos 'n ma optree. God gee aan ons ons nodige brood en bewaar ons sodat ons toekoms veilig in sy hande lê.



MAAR U, HERE,
IS N
BARMHARTIGE
EN GENADIGE
GOD,
LANKMOËDIG
EN VOL VREDE

PSALM 86:14

Tygerberg 101.1 FM
One and Christian



Die Bisoqno gesin, Emily, Leonard, Analie en Xander

GOD HET 'N PLAN MET Emily

November 2019

Lieve Kindervriend

Wat is mooier as 'n kind wat van 'n dowe lamppit na 'n lig op 'n staander verander?
En wat is lekkerder as om te weet jy het 'n aandeel daarin?
Kom ek vertel julle van Emily Bisoqno, 'n dogtertjie van Kraaifontein.

Enkele weke na geboorte tref 'n virusinfeksie vir Emily. Haar ma, Analie, moet haar werk bedank om oor haar te waak. Sy is meesal sieklik en het herhaalde oorprobleme. Die dag toe sy skool toe gaan, het die grootste krisis hierdie broos kindjie getref.

Emily het gesukkel met skoolwerk en aanpassing. Omdat sy skaam is, is sy eenkant toe geskuif. In plaas van hulp het sy aggressie ontlok. Maatjies het haar gespot en h onderwyseres het haar voor almal beledig.

Met groot verwagting het hulle Emily geskuif na iemand wat "tuisonderrig" aanbied. Maar sy het al swaarder gekry. Sy het skool gevrees. Analie sê sy kan onthou hoe Emily, met skooltyd, aan alles by die huis vasgeklou het. Toe, een middag, ontdek hulle dat sy fisies aangerand word. Emily is summier huis toe geneem - sonder skool en hulpeloos.

Daardie Sondag, op moedverloor se vlakte, het Emily van die Sondagskool af gekom met h gekreukelde papiertjie in haar natgeswete handjie. Daarop het gestaan: God het 'n plan met Emily se lewe!

Sy word by Jan Krielskool toegelaat. Dit was so anders. Wat vir Emily uitstaan is dat h kind hulp kan vra - en dit kry! Die juffrou is geduldig en vriendelik. Met jare se ondervinding stel die Spraak- en Taalterapeut gou vas wat gedoen kan word. Sy hoef nie h gehoorstuk te dra nie. Haar taalagterstand word aangespreek. Emily mag eksamens en toetse skryf met die hulp van h



transkribeerder. Dit maak 'n groot verskil, want sy ken die antwoorde, maar kan nie spel en skryf nie. Die beste is om maatjies te hê wat jou aanvaar soos jy is. Die hoogtepunt was om deel te word van houtrekspan.

Die helpende kultuur by Jan Kriel het diep in haar binneste weerklang gevind. Toe een van die senior seuns, Eben, vanjaar gekies is vir die RSA Touthrekspan het hy baie fondse nodig gehad om internasionaal deel te neem. Emily wou hom so graag help om sy droom te bereik ...



Eben en Emily

Sy het vrymoedigheid geneem en na 'n plaaslike radiostasie gegaan. Sy het die CD's wat hulle gegee het, verkoop. Kompetisies is gereel en 'n netwerk van mense is geïnspireer deur Emily se ywer. Uiteindelik kon sy Eben met R10 000 help!

Die Here het inderdaad h plan met haar lewe. Hy het van haar h helper gemaak. Emily het h helder lig op h staander geword!

Jan Kriel is deel van die Here se plan met baie kinders. Hier word 580 ander kinders, soos Emily, gehelp om "Liggies" te word. Daarom hou Jan Kriel al vir 30 jaar h jaarlikse Liggieboomfees. 'n Groot boom word soos 'n Kersboom met duisende liggies versier. Ons sing Kersliedere saam en hou h kerskonsert. Elke liggie vertel die storie van 'n kind van Jan Kriel. En gesamentlik vertel die Liggieboom van God se liefdesplan met Die Kind van Bethlehem - die Lig vir die Wêreld!

Dit is hier waar jy 'n rol kan speel om 'n kind se lewe te verander! Borg asb 'n liggie vir 'n kind teen 'n skrale R100. Jy kan ook 2 liggies (R200) borg of dalk vyf (R500) of wat van 'n string van 10 (R1000)?

Noudat jy weet hoe jou liggie-borg 'n kind verander van afhanklik tot 'n helper, vra ek dat jy sal help. Daar is 580 kinders wat jou ondersteuning nodig het! Gebruik asb die skakel na ons webwerf se "DONATE" bladsy om 'n maklike en veilige betaling te doen. Donasies aan Jan Kriel is belastingaftrekbaar.

BORG HIER 'N LIGGIE VIR 'N KIND

Gaan na hierdie skakel:
<http://jankriel.org.za/donate/>

Dankie by voorbaat vir jou vrygewige liefde.

Mag jy in 2019 'n kwaliteit Kersfees beleef - omring met mense wat altyd reg is om lief te hê en te help.

Fanie

Dr Fanie Herholdt
Direkteur Jan Kriel Instituut



2018 Liggieboom